

البندق طاش رشاش على شعري

شعر عامية

عبدہ الزراع

منتصف يوليہ ١٩٩٦

- ★ البندق طاش رشاش - شعر عامية
- ★ الطبعة الأولى - منتصف يوليو 1996
- ★ الهيئة العامة لقصور الثقافة

● تصميم الغلاف : عاطف عبد العزيز

● لوحة الغلاف : من مائيات الفنان عدلى رزق الله

إبداعات

شهرية

الهيئة العامة لقصور الثقافة

رئيس مجلس الإدارة

ورئيس التحرير

حسين مهران

المشرف العام

على أبو شادي

نائب رئيس التحرير

محمد كشيك

مدير التحرير

سيد عبد الخالق

المراسلات : باسم مدير التحرير على العنوان التالي :
١٦ شارع أمين سامي القصر العيني - القاهرة رقم بريدى ١١٥٦١

الكلمه إيد ، الكلمه رجل ، الكلمه باب ،
الكلمه نجمه كهرييه فى الضباب
الكلمه كوبرى صلب فوق بحر العُباب
الجن يا أجباب ، ما يقدر يهدمه
فاتكلموا ..

(صلاح چاهين)

إهداء...

إلى الحب فى زمن المستحيل

ثم - من قبل ومن بعد -

إلى من علمانى الشعر:

أبى... ..

وأُمى... ..

عبدہ،

حروفك محاوره

□ ١ □

ورغم انشطار المسافة الى بينى وبينك
وبعد السواقى الى وخدامى منى
لروح الغيطان الشفيفه
يا طيف الأمانى الى خاصمت طريقى
ما تعرف لى سكة.. ولا حتى درب
وقبر الخطاوى بيحدفنى خطوة بخطوة
ويدفنى موت الى باع النهاية
بزيف البريق/ الغريق لخصم النجاسة

ياوردة بتشرب من العطر جنة
وحنة ايديكى بتحضن صبايا البراءة
وهمزة وصالك مراسى النجوم الى تاهت
وضلت طريقها ف زحمة عيالها/ المصيبة

ياقوة تلاقى العواطف ف مهرة عيونك
وأحمر خدودك بيضربنى ضربة ف مقتل
وأصبح صريع الرموش الى طاقت ربوع الخلايق
ترفرف / ترفرف

يمامة مهاجرة بعرض البلاد
وتبعد/ وتبعد
وترجع ف قلبي رصاص التلاقى الدفين
أنا وانتى.. فين!!
وأنا وانتى مين
يا نخلة بتشرب رحيق الوئام
وفاكة الرموز هديل الحمام
وعارفه باني مسافر ف قلبك نديم الرجوع
وباكركه أكون دخيل الملامح ف قمقم
عواطفك.. ياست البنات
لغات العيون
بتعجز تفك الرموز الطلاس
معادلة مصير الضحايا/ الضياع

يا قلب.. مايعرف خمول اللقا
يانسمة بتسرح تصالح عيون الغزال
اللى شارد ف درب البرية
أنا قلبي مال.. وأصبح محال التحدى الخلاص
بتسرق كعوبك ضى العيون العطاشى
لحضن الدفا

ومنبت ضفايرك ببيعت حدوده لخصرك
يرشرش وداع
وشهد الشفايف يرطب ضمير العذاب التشفى
ياخايف تغوص حتى النخاع

تزغلل خمائل نهودك لقلب الضحية وليمة
فريدة/ وحيدة ف جو الملاك التوحد
أنا وانتى فى إلتحام الأنا بالأنا
وباعشق أنا/ التحدى الصراع الضياع
ف ضل الفريسة
وانتى النشيد/ العنيد لجملة مفاتن شهية
شقية كحلة خلية
بتحصد عيون الربيع اللى فارد حدوده مدى
تصبه ف كاسات المحبة/ المودة.. التصافى
الخرافى زنيه ف قلب القلوب اللى دايرة
طاحونة بتفرك شعير
تطير عقل اللى عجنك صباة ف ضى القمر
بتشرب نبيذ الحلال التربع على عرش قلبك
ويرجع حلمه مايعرف أصول التهجى
يموت التصدى لنور الحقيقة / البيان

بيان الموانى بتفتح لحد عبور السفن
وارتحالها.. وتنسى زعيقها ف زحمة مسيرها
وترسل نداها مع كل غصن مسافر
يعافر لدربه البعيد/البعيد/ البعيد
يا عاشقة الحوار/ المحاوره/ التورط
ف جو القضية

حروفك محاوره.. ولغز ومداوره
ح فك رموزهم من البدء حتى النهاية
(أ) ألم الكفوف اللى حنت عليكى ف قلبى يجوروا النداء
(م) مصيرى يلمونى حبة حطام..
بقية عذابى الطويل/ الطويل.. الغريق/
الغريق ف بحرك
يا طالع من البحر عرس الغرام

(ل) لمونى من البدء فيكى.. وغصت
ف كيانك.. غرقت ف عنكى
رمولى حبال النجاة رفضت التشبث
لأنى هاويكى

يامادنة.. وجامع
وكفر.. ومدينة
ياضمانى ضمة أمى الحزينة
عيونك مراسى لقلبي وسفينة
وأنا وانتى مينا
أنا وانتى مينا.

البندق طاش / رشاش
على شعري

باخرج.. من كون كوني
من سر التكوين المتخمر تحت جفوني
من قمح التجاعيد المفرومه
ف لحم جنوني
من تصويره «أبوي وأمي» المهزوزه
على جدارى المهزوز تشويش..

وأزيز الشجر المفروش أباطيل/
يليل فينا المغصوب يتاخذ رغبه
بيشوف بشويش الوقت بيتاخر
لماخر سفن التغريب
بيشيب النبت الطالع على بز الوهم
الفايض فينا طشوط الخضه
بيقايض بالروح.. ويعد جروح ومداين
وكماين جسمه صدف مشروخ
موهوب للنطق نهيق/ ونقيق
بيخروش ف الودن الوسخ المصفر
لزوجه..
مع إنه حديد الضهر المسنون بزناود

الطلقة خلاص..

والبطن مافات المس عليها حرير

وفرير النمر قماش

غشاش إن قلت باحب الدوران حولين

الشطط الوالع زيف/ ونزيف..

وأنا بالع كل الأكم المسفوك ف بلادى

المهدوده بطول الدهر عجيج/

ورقيق السوق.. رافض ينساق

مع إنه محتاج الرمق المتبعتر على

خد البننت الطازج غيره..

والحيره الخانقه الطفل الراجل

غصبين عن إرغام الهجره ف دمه

واللحن التراليم - اللحظه الحاره مزاج مكسور

ضحكات الشبق الحموى كاسات بتدور

بيشر العسل المغسول من خمر كعوب

الخلج الفجرى خيطان كتان..

وبيان الصبح السايح زبده طريق موحول

بيحول الشوف المتمدد على طول الزمن

المتخندق فينا هباب..

والبنندق طاش رشاش على شعرى

انفجرت منه قصيدة حداد
بتدق جدار مسكوك على ناسه
المتنشيه رخام..
وحزام الطياير المشدود «ع» الكرش»
الطالل خاين.
مش باين ع التصاوير ف السنتر
باين ع الهامش.. مع إنه الأخطر

وبحبل السر المربوط بأطراف الوجع
المسجون ف عيوني
أنا رايح ألم الألفاز
وح فجر بإديا الغاز المتشحطر
على وش غيطان الإنبات
حيات الإخصاب ماعدتش بتعشق
طين المواويل والليل..
ولا ترقص ع «الروك والجاز»

وأنا رحت هناك وصفولي
وعرفت بعقلي .. وبعنوني
إن العمر ان طال.. انجاز
ان العمران طال
.... انجاز

میں علمک؟

يا نرجسة..
عاشق عيونك... والمسا
ومهسهسه الألحان نغم رقراق
على صفحة هدوء الكون
مين علمك الشخبطات فوق البراوين الذهب؟!
مين علمك لون الصفا «ف» الابتسام؟!
وانتى وسام الأوسمه
اننى الهنا المنقوع «ف» تنهيدة رضا روحى
تطلع شروحي وطن مطبوعه بجروحي
تغلب على الأسئلة المنكوشة جوايا
أهرب «ف» نفسى.. وانتحر خمرة شفايفك
ندى خدودك ييشرب فرحتى منى رحيق فواح
مانتى المنى.. انتى (منى) قلبى
راهننت طلة رموشك «ع» الوفا
والانتساب للضى
والنور الموارد شجن عطشان على شجر
اللقا المشتاق
ليوم ما يدق باب قلبك
ويحدفنى وترحساس بدقاته

وحدوتة صفا روحك
بترمي الضل فوق وشي
أبات وأصحي.. وأثار مشي ما بينا مشي
لكن حامشي
على شوك الألم فرحان
واطب محيطك الهادي
ومش نادم على طبه
عشان حبه
عشان النرجس النائم على شطوطه
بيحكى طلة التفاح
في غيط بلدي.

للقاهرة أحلام بتدخل بعضها منى

المدن..

بتبخ من جوفها التوتر والقلق

اتفلق حلمنا المشروخ/ شروخ

بتدوخ «ف» داخل مدخلك

مين دخلك ف الشارع المزنوق ما بين

الخمارات؟

زرات تناثر هدمتك وقت اشتعالك بالحصى

المضروب ف لحمك

تنهشك رصفان بيوت القاهرة

مانت الغريب جوه أرضك

قصدي.. انت اللي شارى فدانين أوهاى

وخضه.. وعيون غناوى بتسبقك يمة الحلم

الغبى

خطفت ضناك من حضنك المفتوح رحيل

عرضك حاشيفعلك على كل البارات

فيزة دخولك «م» الببيان القزاز هزاز

سرير الارتياح الغير مباح/

ونباح كلاب الارتزاق «م» السيد المادد
أيديه تنبّاس
خناس شيطان التودد والانبهار بالزيف
وخريف ليالى القرى خوفاً
مسكوكه كل السكك ترايبس
وخسيس يموت من غير تمن
عفن ممدود على طول السدود الطين

يامين يهد المستحيل ويشيل غيطان
«م» التيل؟!
والنيل بيهرب «م» الشمال يحذف جنون
الطمي «ف» المجرى
إقرا عدية يس.. واستقرا
ايه اللي يجرى لوتعد الموج؟!
وتفوق على دهشتك عريانه فيك
أحسن ما يضحك عليك المعجباني بلعبتك اقرا
«فاتحة الكتاب»
واستعيز باللي متمد «ف» قلبك من سنين عجاف
ما تخفش «ع» الوتر الأخير «م» الليل
صلى صلاتك واستهجي الأمنيات

يجرى دمك الخجلان ملفوف «ف» توب
دبلان.. يحضن الزبد اللي وافد من طين
بلا مأوى
تسواك عيون المشتاقين للشفق
وقتني ما يطرح «ع» البيوت
ويغوت نهار صفصاف بقايا مسبحة جدك
المركون على كرسي خشب بيبارك الزرع
بايده اللي انحنت «م» الطبطبات «ع» الأرض
تنطق بالخضار
ترويها جداول مهجته المليانه خير
مانا جدى كان غاوى الزركشه واللعب «ف»
التوت اللي واقف صارى «ف» روح المركبة
العاشقه رياح الشرق والتوحيد
بتجيد خداع الموجه والملاح
تفاح بيقسم فرحته «ع» الخلق لحظة ما فاز
البحر بالدوران
حران أنا بالوجد والشوق المخالف جتنى
هريان

مانا أصلى كنت الواحد الممنوع تمنى/ورجا

ونا أصلى كنت المنحدر من فوق سطوح غلطانه
فى قيراط نحاس

مادبش فى البحر لكن رح يدوب
مشطوب يا اسمى من براويز الحيطان الغوص
ومقطعين كل الحبال اللى كات مربوطه بالطرف
لبيض من كتاب مقطوع

خاب الوفاق.. ولا يوم غفر الحوارى الضيقه
نقروا فوق الشبايبك الرخام
مانا أصلى كنت حمامة بيضة مولفة
والقفص من غير صحاب

ماتروح تودع حلمك المنسى «ف» زحمة
دهشتك بالضى «م» القمر المجاور بيتكم
المرمى «ف» الصحارى الرمل.. والوطن
المقطع بالسياط الريح بترميه يصيح كتكوت
بيحلم بالخروج
وبروجى يضرب دندنات/ تعظيم سلاح / كتفأ
أصل السلاح/ سفاح لحظة ماتك تكة «ع»
الزناد.. يفنى الولاد القايمه «ع» السجود

ترا تیل ملایکہ.. ورد من زهر الکلام
من غیر ملام.. راجعین عجبین مسود لونہ
الفرن رافض یحضنہ.. یطلع عذاب القهر فینا

ودعنا وش القاهرة
لفظتنا شوارعها الوسيعه
ماودعتنا بنظره واحده/ ولاحد فيها سمع ندانا..
ولارد حتى تحيه كات مرميه «م» الوش
البرئ.. واديننا بتملس عليها
تشتهى الإحساس تبدل من حديد
حلطنا المشروخ بيضحك من بعيد
ويعيد «ف» الضحك من تانى
ويضحك.. أAAAAAAAAA يزيد
واحنا بيعصرنا الخجل
شايلين أمل أعرج على كتف الزمن
مانقولش كات القاهرة
(أم القرى) لكنها صرعى الأيدين
الخائنه
لحظة.. مايبنسرق حلم
ال غ ر ي ب.

آيات من قلبك الصافي
إلى... نجيب محفوظ

طالع بخار..
من زمهرير النار
أنهار قلق بتدق فى قلبى الخبر
مسمار..
وأنا الواقف زهول/ مدهول
شميت شياط الدم ف عروقى
والحرف تاه من فوق شفاه الكون
وبقيت كما المجنون
صوتى هرب مدبوح
بيجيب (نجيب) من بين جدار
الروح

اصبر ياعم (نجيب)
خلينى أجيّب لولادى من غيظك
ملا محك..
واصطفيك ليهم وداعه
وابتهاج
دالبحر يوم لوهاج
ح يفيض على شطوطك

نغم خجلان

بايت حزين

بتعد ف (ولاد حارتنا) المحرومين
وترقع الهدمه على جسد النحيل
وتدراوى جرح المستحيل
بتخاف عليك رطب النجيل / لتميل
وبتحضنك أراغيل

باقى ياعم (نجيب)

علشان كلامك حى

زى الضمير الحى

شمينا فيه ريحة (الحسين والسيدة)

و(زقاق المدق) ف قلبى دق

صحيت على صوت الأذان

كنت أنت ماشى ع (الطريق)

بتصافح الأحباب

والبسمة فوق الوش بتملس على الشهدا

وع الأيتام

ويترتل آيات من قلبك الصافى

كان صوتك الخافت
ببتردد صدى .. يقول:
«صباح الخير على الورد
الى فتح فى جناين مصر»
...

عناقيد من الأحزان

لا بد .. يا صوت الخرس
تحت باط الفجر
تندده لى رعشة رموش الخيول
وتر مشدود على ننى اللى باح بالسر
شفق النهار مفروش على شطوط المغارب
جنتين رمان
تصاوير من العمر القصير اللى ضايع
خلف قضبان الصدى
هارب بحلمى الضعيف/ النحيف
اللى خايف يرتعش أسفلت موت
يتمرجح الحلم القديم ما بين الرمش
والحاجب/ دايب «ف» تويه القصب غاضب
من شرقة القلل البوار

دوار - أنا «ع» المهرجان الزور
والبهلوان / أراجوز
أرض الوطن ح تبور / والدور
طول ما الخريف بيلطخ الوش الحليب بالطين
ويغربل الدود اللى بيحجى «ف» لحمنا الفايث
عضمنا المدقوق

شوق البنات الحزين
جوا دواليب الزمن/ براوين

أخش جوا البحر.. يرسمنى الأكم مسافات
ألوفات من الخلق اللى باعوا ملامح
جسمهم صلصال
حجر الوصال بيلف: ياطاحونة
مشحونة بالمونة
ملعونة/ مجنونة
مين اللى قال: ياغريق
إن البنات بالحب.. مفتونة؟!

يامكر مين علمك.. تمكر؟!
ومين فطن خدودك ع الخداع/ المراوغ؟!
ومين يقدر «ع» الزمن يشترط
ولو شرطه؟!
- شرطه ورا شرطه
حنكمل الخرطة -

مشطوف ياسن القلم.. والرمح

مهزوز ياوش اللي طارح
ندم «ع» الجرح
مادد ياعرق الصبا من جدرنا الممصوص
ملعون لصوص الحواري
والجواري البوص

تايب أنا/ منى
ومن المحال الرفض
مشدود بكفى البراح
شاتت أنا
جوا المدارات الفرق
زاغ الضمير.. انحرق

بحار..
وبأصطاد المحار
واقفه العيون البكر تتشطف على الساحل
تحن للود القديم
مراجيح حبال المشانق
تتنصب «ع» القد..
وجع اللي ما تابوا بصهدك

يا حبال الموت

بيتفرط دم الوريد / عناقيد

«م» الماس الى قايد فوق جبين المودن

الله أكبر..

نور المسافرين جوا الأحجبة

الله أكبر..

خطوة وصالك للبراق

وخريطة الأدعية

.....

.....

عند اغتصاب الذنب قوتك

لحظة وصالك للمزيد

اخفق بإيدك صوتك

واعلن هناك موتك

ياتوبة الوالى الى بيغالى

«ف» توب الحرير

والمطحونين قش المكن

بيغالوا «ف» التقطير

رمش الشجر

هز رغيف الخمير

كل العيال جفنهم نايم

مهدود بيتشعبط على الدايب

- غالب علينا الموات غالب -

مفتوح يا ضلفتين باب الفقير

مفتوح/ ماتتوارب

إنتى هنى

يا حبيبتي..
إغرزيني سهم راسق
جوه قلبك
انطقينى كلمة واحدة
بين قصيدك
ارسميني فوق تابوتي
أنسى موتى
وافتكروا
نبضك ف قلبى

يا حبيبتي..
حر السكات مش خرس
طرطشت دمي ع الطريق لاختصر..
ودهننت جلدى من بارود
مصحون
كان الهوى..
مشدود بريح اللى نوى..
واللى انكوى

على جمر نار

فى برد طوبة

طوبى..

لقلبى اللى ركب.. موج البحار

طوبى..

لدمعى اللى هجر

كل العيون

طوبى..

لساعدى اللى كسر.

ذل القيود

طوبى..

لحضنى رحيب

وسع الفضاء.. طوبى

طوبى.. ومش توبة

على جبيننا مكتوبة

نعيش العمر مانطاطى..

ولانوية.

يا حبيبتى..

لفلقى تعب السنين المرة

جوه صرة..

واطرحيها ف قاع محيط
أضمي حزنك ف خيط..
وانزلي به «ف» الغويط..
واطلعي مغسوله منه

يا حبيتي..

نفسى أضمك زى وردة
فى جنينة
نفسى أضمك بين أيديه..
وافتح الرمشين شوية
تبقى جوه الننى/ منى

يا حبيتى..

.....
.....

إنتى منى..

وأنا حنك
رغم كل الناس..
ورغمك

مش حاسييك

تمشى منى!!

مش حاسييك

تمشى منى!!

بريد الأسئلة

□ ◦ ◦ □

الشوارع..
بتلم خطوك/ تحضنك
بتحنك
لما سابوك فوق الطريق
عريان
غريق
شأت
من الخلم الدفى

مزروع..
«ف» ن الشجر أوطان
ويتستخبي «م» الخجل
أوراق كسوف
ما يستحيش منك
أدان أديك..
ولايك يموت الهوى العذرى
بزر الهلاك عدى
ميعاد غزسه
شيطان/ ملاك

والعشق مين هرسه؟!

.....

ياراحلين «م» البلد

سيبوا الولد يطلع

عجين أخضر

بين الربوع ينجلد

يبقى عصى الدم

لكن ح يبقى

ولد.

كبريت مقرز

بين شطوط مدفعك

مين يدفعك تمن السكات

«ع» الصبر؟!

وينحت العضم اللي باقى

من هيكك تمثال

صلوا صلاة لامتثال

للخالق البارى

أنا نارى كات أحمر

شظايا لانفجار..

والنار

وكات أنهار بترحل للبحار

أمواج تقور

تحضن سحب الكون

وكات كون هياج

مجنون

ثورة شعوب لاختصام

«ع» الكرسي

ارثى الى مات فطيس الغدر/ واللعنة

ماحنا الى علمنا (قاييل)

ازاي نبيع. وقتن نكون بنريد

إفتح بريد الأسئلة..

تلقى الجواب مكتوب.

حروف الهجاية

بأفرفش تراب المروءة/
عذابى ...
وألّم رماد الحريق/
اللى باقى ..
واكون لك شراقى
تخبى ضلوعى دموعى/
اللى باتت
تولع شموعى ف عقد بيضوى
فى مزمر حبيبتى
خدتنى ف دايرة ..
ودايرة طاحونة ..
وقرشة اللمونة/
سراير مريضة/
فريضة علينا نضحى بدمانا ..
ونقتل هوانا ..
ونسبق غناوى/
بتحكى الحكاوى ..
وقلبى اللى ناوى/
يهْد المغابِد

على راس (دليلة) ..
وروسنا اللي علو المداين
ما تبقى ذليلة.

غيايى بداية المنافسة الشريفة
عنادى إنتهاء ..
وحاخسر عيونك رهان
المساومة الدينية ..
وخنجر ف قلب الحقيقة
يئن التودد
تردد ف صوتى /
يلغى مسامعى /
بيعمى بصيرتى ..
وأمسك ف حيرتى /
أنطور شعورها
فتجربى / تهبنى ..
وأنا لية بأبنى قسايد
بدمى !؟ ..
وهمى بينضح شراع
المراكب ..

ولو يوم .. يا راكب
نسيت الهواية
كانك .. يا شاعر
نسيت الدواية ..
وترجع كانك ف عز البداية ..
حروف الهجاية
حاتكتب ملامحك ..
وجرحك
قصيدة/
رواية.

تسبیح

شَدِيدِ طَرَاظِيفِ الْمَطَرِ
من عِبي
رخت مشاوير الشتاء المنسية

روحك وطن ..
بتحلم بالمستحيل
دالليل مدَى مسكون ضباب
دَب الخراب .. جوا تجاعيد وشك المنسى
«ف» طيات الزمن
تمن السكّات للروح
..... وطن

مجروح بسيف الهمّ
لحظة ما كان «ع» الرمش
ولحظة ما كان الطريق عريان
قدم بيمد/ كحدّ انشطار الشمس
دالخضة سارقة «م» الجبين الضى
ومبعتراه شعاعات/ حبات مطر فوق
القزاز الهشّ
بتتلضمّ عنقود خرز وقت التماس

بين الشُعاع والأرض
فَرَضَ إِنْتِحَارَ ضِلِّ النخيل / لميل
يَمَّةً شَطُوطِ الْإِنْحِيَارِ
ما تقولش فاز
اللى برى روحه قلم
كتب الروايات المجاز
مشحونة بالموت المفاجئ
والإنحدار من فوق عروش الإنتعاش
لَمْ الْأَلَمُ مِنْ فَوْقِ جِدَارِ الْأَمْسِ
تتجمع النجمات

روحك وطن ..
مقطومة على بحة الناي الحزين
صوت الأذان
«حطين»

روحك وطن ..
عاشقه لِقَطْرِ الْمَطَرِ
لهمس السواقي والشجر والكون
طفل البكارة حَبَّى فَوْقِ الصِّرَاطِ

رخت الجفون
«ف» الزمهرير غسّلت رموشها
طلعت ثمار أنهار عسل
غسّلت كفوفها
بالمسك والعنبر

بات الشتا يحلم
على طرف الأمنية
بحر الأمسية
وشدو البلابل .. والأغنية

روحك وطن ..
بتزف جوانا الأمان
لحظة «م» كان نطفة خروج للكون
تجهضنى روحك/ جروحك
مضغة بعضم وعين
«فتبارك الله أحسن الخالقين»

روحك وطن ..
بتشدنى لصوت النشيد

«ف» الحضرة لما يزيد
وجد المريد
حبل الصفا بيقيد
تتكعبل التوبة «ف» ضل المسبحة
وتضيق مسافات اللقا
بين المريد والشيخ
«شئ الله يا سيدنا الشيخ»
دنا بين ضلوع الأضرحة
رح أشيخ
لو كان جواز السفر
بين الجنان تسبيح
لو كان جواز السفر
بين الجنان
تسبيح.

نرجسيات

□ ۷۳ □

بيخطفنى ليمّة يمتك خوفى
ويبدرنى بقلب الأوردة ترحال
أصير ف الحال :
أنا المفتون/
أنا المفتون بعقد اللؤلؤ المرهون على جـيدك
تبات إيدك تعد نجومك السهرانة
فى ميلادى
وترسم للقا مواويل من زهر فستانك
وفنانك هناك شارد بيتحدى .. ويتراهن
ويغزل من رموش الكون/ ولد مجنون
بصيد النرجس البرى ..
ورنة أسئلة حيرى على جبينه
بتنزف من صدى صوتك
لهيب خجلان.

عيونك للمدى والنور والعصافير
بترسل تحياتى
وتبعث بالهوى المراسيل
خجل ناضح على جبينك
بتترزين ورود روحك ..
وبتخاصم ورود روحى

وأنا شايفك يمام واقف
على حدود المدى المفتوح
بيطلقني حصان رماح
ف نهر عبيرك الصافي
وأوصافي بتجري يمتك توعم
شديد الوصف لأوصافك
محاورة مهجتك نائمة على قلبي بتتصارع
ويتقطع حبال الشوق بوهم رخيص
ملوش منطلق .. ولا برهان
دنا السهران على شمعة لهب حيران
ما تيجي نغير التواريخ
ونرجع بالزمن رجعة
ونكتب ع الشجر آية ألقا قلبين
بيجمعهم صفا وحنين
وترتيل المسأ المطروح على
وش السما الصافية
ماتيجي نعلم الأطفال
غنا الأوطان
وترنيمة هوى الكروان
«ف» ضمة لهفة المشتاق
على بساط الهنا المفروش

أحلام على جبين القدر

□ w □

بيدقُ بآبك .. مطر
عطر جبين الغيطان أطيان وطن
فيدندن الصبح الحليب/ الفرح
فرط الخدود/ انطرح
من ترتيلات الأوردة .. مشدود وتر
بيحازى فى الأزمنة
جوه الفصول الممكنة
بيحن قلبى للشفق ..
ولا نبعاث الضى من رحم الشروق
تترصص الأحلام على جبين القدر
وتشيب حواديت الضلام والكبت
ولا متلاك الرؤية ف التوابيت
كبيت على وجعى ألم/ فننقك
اندك ركنى المنصهر .. أوجاع
وجريت ألم ف البلاد م القهر
صابنى الدوار
فدخلت حلبة لانكسار المر
-الدركان على ملامح جنتى

فتزحزحت عيناه ناحية الطرب

قلبي هرب

لكن وحين سألته

رد الإجابة .. مضطرب -

بتخشني الرغبة

فا أبأت على وجدك غريب

سابق عليكى دهشتى

يا رغبتى المكبوتة ف السفر

الموازى ضحكك

أنا غنوتك

ولا اشتياقك للندى

غير ملامح بهجتك

فكى رموز الطلسم المغموس ف دمي

بلور بيكسر مهجتي ..

ويرتل الأحزان بهمى

ويبلل الوجد المخالف للدروب

الصاحبة جوانا

ماحنا اللي علمناه ييات

جوه العيون دانة

واحنا اللي رسينا المراكب ف الرياح

الهوج

لا شرع ضرب ف الموج

ولا برودنا

جوا الحدود العوج

كل المرور ... انتباه

فتش معايا الجناة

بالعنف أو بال

طالالال ... خ

ط ي خ

- حين انسكابك داخلي

يا قاتلى .. لا تندهش

فالدرب متسع لموتى .. مرتين

فالدرب متسع لموتى

م ر ت ي ن -

...

دهاليز المغيب
إلى روح الشاعر «سعد شحاته»

كُنت بتخبى الوجع ..
وكنت شاييل بين ضلوعك أنين
انفرط عُقد الألم
اسودت اليُفط/ السنين

على فين مسافر/ يا صاحبي
والقطر بيعافر سِلك خربانة فيك
هربانة يا ريحة اللقا «م» الضيف
منتاش ضَعيف
لكن شفيف
كل القصايد خريف
والعيد مجاش
مطاقش لبس الجديد
كل المصاطب تعيد
«عدودة» الموت/ لا خطبوط
مكتوب على ضُلف الهوى موتك
«مانت ابن موت»
صهد البيوت مكبوت
وانت اللي مخزون بالوطن

هَمْ .. وألم محزون
ساعة ما تدخل «ف» الوداع
بتشيب دهاليز المغيب/
و
ت
غ
ى
ب
.....

رعد الوقت بارود / مفروط

إقرانى «ف» عب الوقت خريطة موت
بتحاصر نفس بتزهق رهط ملان مغشوش
بتبوش على طرف السن الغاير
جوا مدار مكسور/ بتدور بالونة غاز «ف»
الشمس المكسوفة شعاع الوهج
بتشقلب روح/ بتبوح ..
تقاليع «ف» البيع الهين
نص هزار .. معتوه البيه الراضى تسامح غفلة
تتكوم مصارين الغايب «ف» التدويق الفاتر
فتارين العين الزايغة «ف» حدود الممكن
والمسموح ..
والحرب الدائرة ما بينى وبين العالم كون/ مكنون
وزبون حداد النار
بيمص دمانا العايمة شطوط
أنهار/ وبينطق رعد الوقت الخاين فينا بارود/
مفروط .. ويلعب جوه الملعب ديب أراجوز
الحيلة وداد الوش ملامح طيبة/ والخيبة
بتنسج كل خيوط العتمة عناكب زيف .. بتهش
غياب دراويش/ بتعيش «ف» التوهة العمر
الخالى ضجيج .. ويتطمس رؤية شوف

مكشوف «ف» دفاتر فاتحة نياپ اللحظة حريق
إذا كات طرايبش العيلة الماسكة زمام الخلق
النايمة سكات .. مشدوده ليّم البير المخفى
بيشفط نطف الزيت/ «م» البيت الهائم خلف
جدار الشجر الناشف قلب خريف ..
وإذا كات تفاعيل البحر الواحد ما تغطيش لحن
قصيده بتزعق تنهيد لبعيد
ادحرج فيها .. وعيد الأوتار المشدودة هشاشة
شاش مطاط بيحاف الشد «ف» لحظة عند
وطن مفلوت «م» الإيد
إحباط العالم كوم/ والنوم بيحربى الكسل
الأزلى .. والديح العلنى «ف» قلب الليل سمران
والشوك الغازز تحت بطاطى
بيطاطى نزيّف الدهشة رهان الكيف
أتلفص/
واقرفص جوه ضلوعى الممسوخة
تشوه
وأ ..
ت
و
ه .

رنازالليل أباريق مدهوشة

ونسيم البحر الهابـ زغايـ
بيمس الروح
ف تبوح بالوجع المدفون
«ف» السدر الغرقان
أحزان
و «ف» زحمة أحلامى التايهة
خطاوى كسيحة
بتخلبط «ف» التواريخ
وأتكعب «ف» الأيام
فأموت مفزوع
على ناصية وجدى
عجلات العرييات
عمالة بتجرى على ضلوعى
وماكنش طلوعى وخرى
أنا ابن القطفة الأولى
والغولة أم ضفاير محلولة
كات «ف» الحواديت
بتردها الجدة علينا
وإحنا صغار
وترضعنا لبن الصفصاف

البكرى
وتشربنا نبيذ الحبّ النشوان بحنان
و«ف» عزّ «م» كات
اللحظة جنان
هزنى صاحبي القاعد جنبى
وقال لى .. إقد ... را
ف قرئت
كان (إسم على الذكرى(١))
ملعم «ف» الجرائين
وخذتنى الفرحة لآخر
ما تعبت/ قعدت
ف لقيتنى «ف» وسط أصحابى
على (قهوة السندىوى(٢))
والنيل عمال بيغازل
«ف» شطوطه
والموج رقرق
والضحك إن راق
بيصهلل
فيصحنى عروسة النهر النائمة
تاريخ «م» القهر
ف تطوف «ع» الشجر المفروش

ضليلة
فينزُ رزاز الليل أباريق مدهوشة
والجوزة/ عجوزه بتحبي
ما بين القاعدين
وأنا سارح ويا النيل ..
والليل .. والشعر ..
والأحلام الخضرا ..
وحبيبتى النائمة ما بين دراعاى
«ف» آخر توهة
وبتحكىلى ..
عن أيامنا الطولة
والمواعيد ..
والشجرة اللى حفرنا عليها
السهم النافذ
بين قلبين ..
وهسيس الحب ..
والحُسن الدافى
وأنا بأسرق منك بوسة ..
وصوابك لصه مدسوسة
«ف» شعرى
ف فزغنى صوت (براهيم خطاب(٢))

الجاى
من وسط الشارع
بيقول لى .. يا عبده
ما قرتش قصة (عبد الناصر جاد(٤))
كان الجرانان مفتوح
فلمحت بعينى
ما شفتش
كات كل محطات اللحظة
بتهرب منى

-
- (١) شاعر فصيحى
(٢) مقهى فى مدينة (فوه) على غرار (زهرة البستان)
(٣) مهندس مثقف
(٤) قاص.
-

تمثال حجر صامت

طَبَّطْ عَلَى قَلْبِ الْوَدَعِ
إِرْمِينِي كَأَمِ آيَةٍ
خُطْنِي فِ الرَّمْلِ سِكَّةِ
إِقْرَانِي فِ مَرَايَةِ

جَهْلُ الْمَدَاسَاتِ الْخَشَبِ
بِيرِنِ كَعُوبِكَ
الْكَلْبُ تَقْتَقُ فِ جِدْرِ الدَّارِ
هَشِيَّتِهِ .. هَوُو .. هَوُو
أَصْلُهُ غَشِيمِ غَدَارِ
الْحَصَوَةِ وَالْمَقْلَاعِ .. وَتَطْوِيحَةِ دِرَاعَاتِكَ
الْمَجْدَعَةِ تَوِيكَ
عَصْفُورِ صُغِيرٍ فَوْقَ بِلَاطِ الْعَمْدَةِ بِيْعِيْطِ
شَهْمِ الْمَلَامِحِ تَحْضُنُهُ / تَبُوسُهُ
وَتَطْبُطُّ عَلَى رُوحِهِ ..
وَتَرْدُ فِيهِ الرُّوحَ
مَفْتُوحَ عَلَيْكَ الْوَطَنَ بِيْنَزْ
وَالْجُرْحَ غَزَّ الْقَلْبَ بِرِصَاصِهِ
مَرْصُوعَةَ كُلِّ الْوَلَادِ السُّمْرِ / طَوَابِيرِ
وَمَشْمَرِينَ الْإِيْدِينَ مَسْنُودَةَ عِ التَّوَابِيْتِ

والبيت مضلم ف عز الضهر
 خجلك بيتمدد بساط دم المخاض
 البكر
 والسكر بينه وبين البلاد المتعكزة
 ف الضلمة .. وبينك
 دهايل بيوت النجع والتوهان
 وسنين ما تتعش
 الولد لا خضر ف ركن القاعة
 تمثال حجر صامت
 ف حضرة أبوه
 هـ و و و و و و و و و و
 دبان حوارى النجع فوق وشه ما يتعش
 م الزلزلة لحظة ما بص أبوه
 ولا نشش
 أصبح قزاز مدشش
 مستحيل يتلم
 والوش حاقرن دم
 الوش حاقرن دم

له تحت الطبع :

- تراويل مسا رايق ديوان شعر للكبار

وله قيد النشر

- رسمنا وردة (سلسلة كتاب قطر الندى)
ديوان أغاني للأطفال

المحتويات

٩	حروفك محاورة
١٧	البندق طاش رشاش على شعري
٢٣	مين علمك ؟
٢٧	للقاهرة أحلام بتدخل بعضها منى
٣٥	آيات من قلبك الصافي
٤١	عناقيد من الأحزان
٤٩	إنتى منى
٥٥	بريد الأسئلة
٦١	حروف الهجاية
٦٧	تسبيح
٧٣	نرجسيات
٧٧	أحلام على جبين القدر
٨٣	دهاليز المغيب
٨٧	رعد الوقت بارود / مفروط
٩١	رزاز الليل أباريق مدهوشة
٩٧	تمثال حجر صامت

صدر من هذه السلسلة

- ١ - شجرة البداياتأشرف أبو جليل
 - ٢ - خيمة فى الليلمحمود الحلوانى
 - ٣ - حديث خاص عن الجدة أحمد أبو خنيجر
 - ٤ - الحالة ٩٤ وليد يوسف
 - ٥ - قصائد للنار عبد الناصر عيسوى
 - ٦ - عصافير الفراغ خالد خريب
 - ٧ - نظرية الجينة القريش محمود عبده
 - ٨ - الحلم الأخير يس الضوى
 - ٩ - ورد الصمت محمد أبو المجد
 - ١٠ - الجبريليةأشرف الخفائيسى
 - ١١ - عيل بيصطاد الحواديتمجدى الجابرى
 - ١٢ - الذى فوق منال السيّد
 - ١٣ - وحده يستمع الى كونشرتو الكيمياء شريف الشافعى
 - ١٤ - كلما رأيت بنتا حلوة أقول ياسعاد سعيد نوح
 - ١٥ - الطرف الأزرق من الطيف ياسر ابراهيم
 - ١٦ - للبيوت شهوة تزلزلنى محمد العسيرى
 - ١٧ - ضلوع ناقصة عصام أبو زيد
 - ١٨ - أوار البنفسج محمد شكرى
 - ١٩ - حيطان بيضاء عاطف عبد العزيز
-

العدد القادم
(أول أغسطس ١٩٩٦)

مسرحية
كليوباترا

سعيد حجاج

رقم الايداع : ٩٦/٨٤٠٨

الأمم المتحدة للنشر والتوزيع : 3904096